

**CONVENIO DE COLABORACIÓN ENTRE A DEPUTACIÓN PROVINCIAL E O CONCELLO DE PONTEVEDRA PARA O FINANCIAMENTO DAS ACTUACIÓNS CULTURAIIS E DE PROMOCIÓN DE PONTEVEDRA ENMARCADAS NA DÉCIMO TERCEIRA EDICIÓN DOS PREMIOS FERROZ**

DOCUMENTO ASINADO ELECTRONICAMENTE POR:

## CONVENIO DE COLABORACIÓN ENTRE A DEPUTACIÓN PROVINCIAL E O CONCELLO DE PONTEVEDRA PARA O FINANCIAMENTO DAS ACTUACIÓNS CULTURAIS E DE PROMOCIÓN DE PONTEVEDRA ENMARCADAS NA DÉCIMO TERCEIRA EDICIÓN DOS PREMIOS FERROZ

En Pontevedra, na data da sinatura electrónica

### INTERVEÑEN

Dunha parte, don Luis López Diéguez, presidente da Deputación Provincial de Pontevedra, na representación legal que da mesma lle atribúe o artigo 34.1.b) da Lei 7/1985, de 2 de abril, reguladora das bases de réxime local (LRBRL).

Doutra, don Miguel Anxo Fernández Lores, alcalde-presidente do Concello de Pontevedra, na representación legal que do mesmo lle atribúe o artigo 124.4.a) do mesmo texto legal.

E actuando don Carlos Cuadrado Romay, en calidade de secretario xeral da Deputación Provincial de Pontevedra, e don José Carlos Castiñeira Piñeiro en calidade de secretario do Concello de Pontevedra, dando fe do acto que se celebra.

Ámbalas dúas partes actúan nas representacións expresadas e recoñécense reciprocamente capacidade bastante para o outorgamento e formalización deste convenio, con base nos principios de colaboración, cooperación, coordinación e eficacia que deben presidir as actuacións das Administracións Públicas e, de común acordo,

### EXPOÑEN

I. Que a Deputación e o Concello de Pontevedra comparten como criterio que os concellos, como administración democraticamente escollida, deben ser os axentes protagonistas nos eidos administrativos aos que ten que corresponder a decisión, o deseño e o impulso da acción local e do desenvolvemento das políticas locais; ao tempo que as deputacións deben actuar como institucións que desenvolvan políticas, plans e actuacións que faciliten que concellos e cidadanía poidan acadar os mesmos dereitos e servizos.

II. Que a tales efectos, a Deputación e o concello de Pontevedra veñen coordinando as súas competencias mediante a sinatura de protocolos e convenios de colaboración para afondar na cooperación administrativa entrámbalas institucións e, particularmente, na cooperación destinada á execución de actuacións de interese xeral que fomenten a cultura, promovan o turismo e promocionen a nivel nacional e internacional a imaxe de Pontevedra e da súa comarca.

III. Que con esta finalidade ambas administracións locais asinaron o 16 de decembro de 2025 un protocolo de colaboración para a tramitación dun expediente de subvención directa



destinada a financiar a anualidade de 2026 do contrato de patrocinio dos Premios Feroz, asinado entre o Concello e a Asociación de Informadores Cinematográficos de España (AICE) o 31.10.2024 para a organización en Pontevedra da décimo terceira edición deste prestixioso galardón, que terá lugar neste exercicio.

Os Feroz son os premios que, de xeito anual, entrega a AICE para recoñecer as mellores producións audiovisuais españolas de cada ano. Creados no ano 2013 pola dita Asociación, o seu obxectivo é o de destacar a excelencia na produción cinematográfica e televisiva en España. Desde o seu inicio, estes premios foron acadando un notable prestixio e repercusión, converténdose nunha das citas máis importantes do cine e da televisión en España, convocando a unha numerosa audiencia nacional e internacional así como ás máis destacadas personalidades do sector audiovisual do noso país.

A gala dos Premios Feroz mostrou un crecemento constante en termos de cobertura mediática e audiencia, acadando unha notable importancia na industria do entretemento.

Para a edición do ano 2026 en Pontevedra, o evento non só destacará o talento do audiovisual español, senón que tamén proporcionará unha plataforma para a promoción da cultura e a economía local, xa que se agarda que máis de mil persoas do sector asistan á gala de entrega dos premios no Pazo de Congressos de Pontevedra.

Ademais, a cidade non só acollerá a cerimonia de premiación, senón tamén unha serie de actividades paralelas como obradoiros, coloquios e proxeccións, consolidando a Pontevedra como o centro neurálxico do audiovisual galego.

A organización e a cobertura mediática dos Premios Feroz, que abarca prensa, radio, televisión e internet, garanten unha visibilidade excepcional para Pontevedra e a súa comarca, posicionándoa como o epicentro cultural e económico durante o evento.

Xa que logo, a celebración da gala dos Premios Feroz en Pontevedra non só aumentará a notoriedade da cidade e a súa oferta cultural, senón que tamén xerará un impacto económico significativo na súa contorna, de xeito destacado nas Rías Baixas, a través do turismo, o consumo local, a revitalización do comercio, a ocupación hostaleira e a promoción da produción audiovisual, contribuíndo ao dinamismo da economía da comarca e fortalecendo o tecido cultural e social de toda a provincia de Pontevedra, polo que a súa relevancia transcende á propia cidade de Pontevedra.

IV. Que o artigo 25 da Lei 7/1985, de 2 de abril, reguladora das bases do réxime local, e en sentido semellante o artigo 80 da Lei 5/1997, do 22 de xullo, de Administración Local de Galicia, establecen que o municipio, para a xestión dos seus intereses e no ámbito das súas competencias, pode promover actividades e prestar os servizos públicos que contribúan a satisfacer as necesidades e aspiracións da comunidade veciñal nos termos establecidos neses artigos, exercendo en todo caso como competencias propias e esenciais, nos termos da lexislación do Estado e das Comunidades Autónomas, en materia de actividades, instalacións e promoción cultural así como de ocupación do lecer e o turismo.



V. Que o artigo 36.1 da Lei 7/1985, de 2 de abril, e o artigo 109.1 da Lei 5/1997, do 22 de xullo, establecen como unha competencia propia da provincia a asistencia e cooperación xurídica, económica e técnica aos municipios, prevendo o artigo 114 da Lei de Administración Local de Galicia que a dita asistencia económico-financeira prestada polas Deputacións Provinciais poderá ser prestada mediante a concesión de subvencións a fondo perdido.

VI. Que a Deputación, nos orzamentos do ano 2026, recolle unha aplicación orzamentaria para convenios co Concello de Pontevedra.

VII. Que os convenios entre Administracións Públicas constitúen o instrumento axeitado para desenvolver a súa cooperación en cuestións de interese común, tal como establecen os artigos 47 e seguintes da Lei 40/2015, de 1 de outubro, do réxime xurídico do sector público, o artigo 57 da Lei 7/1985, de 2 de abril, os artigos 198 e seguintes da Lei 5/1997, de 22 de xullo, tendo en conta tamén o disposto nos artigos 28.1 da Lei 38/2003, de 17 de novembro, xeral de subvencións, e 26.1 da Lei 9/2007, de 13 de xuño, de subvencións de Galicia, cando estipulan que os convenios son o instrumento habitual para canalizar as subvencións previstas nominativamente nos orzamentos das corporacións locais.

VIII. Que a achega económica da Deputación de Pontevedra ten o carácter dunha subvención, en virtude do disposto no artigo 2 da Lei 38/2003, de 17 de novembro, xeral de subvencións, séndolle de aplicación o réxime xurídico das subvencións públicas. Neste senso, á vista do artigo 22.2 desta norma, acredítanse na memoria do expediente razóns de interese público, social e económico suficientes que xustifican a súa concesión, tanto de natureza competencial como pola necesidade de apoiar e complementar a capacidade económica do concello nesta actuación de interese xeral.

IX. Que, de acordo coas precedentes consideracións e en desenvolvemento dos principios de colaboración e cooperación, a Deputación de Pontevedra e o Concello de Pontevedra acordan aprobar este convenio para o financiamento das actuacións culturais e de promoción da cidade enmarcadas na décimo terceira edición dos Premios Feroz, que asinan os aquí comparecentes, con arranxo ás seguintes

## CLÁUSULAS

### PRIMEIRA. OBXECTO DO CONVENIO

O obxecto do presente convenio é o de establecer as bases para a colaboración económica entre a Deputación Provincial e o Concello de Pontevedra para levar a cabo as actuacións culturais e de promoción da cidade enmarcadas na décimo terceira edición dos Premios Feroz, que se desenvolverán na cidade de Pontevedra en xaneiro de 2026.

De acordo con isto, o convenio regula as condicións da subvención que se lle outorga ao Concello de Pontevedra para o financiamento parcial do gasto correspondente á anualidade de 2026 do contrato asinado entre o Concello de Pontevedra e a Asociación de Informadores Cinematográficos de España o 31.10.2024 para o patrocinio da cidade durante a décimo segunda e a décimo terceira edición dos premios Feroz.



## SEGUNDA. FINANCIAMENTO

A actividade obxecto deste convenio ascende á cantidade total de CINCOCENTOS SESENTA E OITO MIL EUROS (568.000,00 €), IVE engadido, que se corresponde co gasto total pola anualidade de 2026 prevista do contrato de patrocinio asinado coa AICE pola décimo terceira edición dos Premios Feroz, que será financiado pola Deputación de Pontevedra coa cantidade de TRESCENTOS MIL EUROS (300.000,00 €) con cargo ao exercicio 2026 e contra a aplicación 2026/942.9420.462.14, e polo Concello de Pontevedra coa cantidade de DOUSCENTOS SESENTA E OITO MIL EUROS (268.000,00 €) con cargo ao exercicio 2026.

O financiamento necesario para a realización da actuación comprendida neste convenio realizarase da seguinte forma:

	2026
<b>Deputación de Pontevedra (52,82%)</b>	300.000,00 €
<b>Concello de Pontevedra (47,18%)</b>	268.000,00 €
<b>Total actividade</b>	568.000,00 €

A achega provincial consiste nunha contía máxima que ascende ao importe sinalado anteriormente, polo que os posibles incrementos que puidesen producirse no gasto ocasionado pola realización da actividade, asumiranse exclusivamente polo Concello de Pontevedra.

No caso de que o gasto da actividade realizada teña un custo inferior ao inicialmente previsto e sempre que isto non supoña unha execución deficiente da totalidade das actuacións, a contía da subvención reducirase proporcionalmente, manténdose constante a porcentaxe de axuda respecto ao custo total do gasto.

### TERCEIRA. EXECUCIÓN DO CONVENIO

1. O desenvolvemento da actividade á que se refire o presente convenio, e o seu financiamento polas partes asinantes, terá lugar durante a vixencia do convenio de acordo coas obrigas de financiamento indicadas na cláusula segunda.
2. A memoria da actividade presentada polo Concello de Pontevedra e que se achega ao expediente tramitado para a aprobación deste convenio, determina o ámbito de actuación do convenio.
3. A Deputación poderá inspeccionar a actuación obxecto do presente convenio cando o teña por conveniente, así como formular as observacións que estime pertinentes, sen prexuízo de que corresponda en exclusiva ao órgano de contratación e ao responsable do contrato a emisión das ordes e instrucións que procedan.
4. As actuacións realizadas no marco do convenio estarán sometidas á comprobación da execución da actuación por parte da Deputación de Pontevedra.

### CUARTA. COMPROMISOS DO CONCELLO DE PONTEVEDRA

O Concello de Pontevedra obrígase a:

- Aprobar o texto do convenio pola Xunta de Goberno Local, de conformidade co artigo 127.1.g) da Lei 7/1985, e remitir unha copia do acordo á Deputación.
- Obter os correspondentes permisos e tramitar ante outros organismos as autorizacións pertinentes que puidesen ser precisas para o desenvolvemento da actuación.
- Asumir individualmente a obriga da realización das actuacións previstas no convenio.
- Destinar os fondos percibidos ao obxecto concreto para o que foron concedidos.
- Comunicar á Deputación de forma inmediata a obtención doutras subvencións ou axudas para a mencionada finalidade procedentes de calquera administración pública ou ente privado nacional ou internacional, con expresión da súa contía.
- Xustificar ante a Deputación o cumprimento da finalidade, da consecución dos obxectivos, da aplicación dos fondos e das demais obrigas previstas no convenio, mediante a rendición da conta xustificativa da subvención nos termos da cláusula sexta.
- Comunicar á Deputación, cunha antelación mínima de corenta e oito horas, a realización de todos os actos públicos que se realicen no marco do convenio, nomeadamente o da gala de entrega dos premios, co obxecto de que asista a Presidencia da Deputación e/ou os/as representantes desa Corporación que se consideren pertinentes.
- Garantir a máxima dignidade institucional para a Presidencia da Deputación na cea ou acto oficial vinculado á gala de entrega dos premios, atendendo ás normas de protocolo establecidas pola súa organización.



– Dar a adecuada publicidade ao convenio conforme a cláusula oitava, de tal xeito que quede constancia que a actividade obxecto deste se levou a cabo en colaboración coa Deputación de Pontevedra.

– Prestar a colaboración e facilitar canta documentación lle sexa requirida no exercicio das funcións de fiscalización e control do destino das axudas que lle corresponden á Intervención Provincial, ao Tribunal de Contas e ao Consello de Contas.

Asemade, o Concello de Pontevedra comprométese ao cumprimento das obrigas contidas na Lei 9/2007, do 13 de xuño, de subvencións de Galicia, e en especial as recollidas no seu artigo 11.

Tamén seralle de aplicación o recollido na Lei 38/2003, de 17 de novembro, xeral de subvencións, e no seu Regulamento, aprobado polo Real decreto 887/2006, de 21 de xullo.

#### **QUINTA. COMPROMISOS DA DEPUTACIÓN DE PONTEVEDRA**

A Deputación obrígase a:

– Financiar os custos derivados do convenio, ata a cantidade disposta na cláusula segunda, que será librada contra a presentación das correspondentes facturas ou documentos análogos acreditativos do gasto efectuado, así como da restante documentación xustificativa necesaria e logo da súa fiscalización pola Intervención provincial.

– Prestar a colaboración e facilitar canta documentación lle sexa requirida no exercicio das funcións de fiscalización e control do destino das axudas que lle corresponden ao Tribunal de Contas e ao Consello de Contas, en cumprimento do disposto no artigo 53 da Lei 40/2015 e da Resolución Presidencial número 2017008767 de 8 de maio de 2017.

#### **SEXTA. XUSTIFICACIÓN E PAGAMENTO**

Segundo o artigo 34.3 da Lei 38/2003 o pago da achega económica regulada neste convenio realizarase mediante transferencia bancaria unha vez que o concello de Pontevedra xustifique axeitadamente a realización da actividade para a que se concedeu a axuda, nos termos establecidos neste convenio e na normativa reguladora das subvencións públicas.

O tipo de xustificación será o de conta xustificativa con achega de xustificantes de gasto, debendo de presentar a seguinte documentación:

- Copia do contrato de patrocinio publicitario financiado pola Deputación.
- Factura rexistrada no punto xeral de entrada de facturas electrónicas da Administración Xeral do Estado (FACE) ou plataforma similar.
- O acordo municipal de aprobación da factura correspondente.



- Unha proba gráfica da difusión dada ao financiamento pola Deputación das actividades asociadas á edición de 2026 dos Premios Feroz.
- Declaración do conxunto de axudas solicitadas, tanto as aprobadas ou concedidas como as pendentes de resolución, para o financiamento do obxecto deste convenio, das distintas administracións públicas competentes ou calquera dos seus organismos, entes ou sociedades.
- Declaración responsable de non estar a entidade beneficiaria incurso en ningunha das causas previstas no artigo 10.2 da LSG, para seren beneficiaria da subvención regulada no convenio.
- Calquera outra documentación esixible pola normativa vixente para a correcta xustificación deste convenio, ou que se considere necesaria para a comprobación da correcta execución do obxecto do convenio.

A xustificación deberá de presentarse ante a Deputación de Pontevedra no prazo de tres meses dende o fin da actuación subvencionada. En todo caso, o prazo máximo para presentar a conta xustificativa da subvención será o 30 de xuño de 2026.

#### **SÉTIMA. COMPATIBILIDADE CON OUTRAS SUBVENCIONS**

Conforme ao disposto no artigo 65.3, letra c) do Regulamento da LXS, aprobado polo Real decreto 887/2006, do 21 de xullo, a achega económica prevista no presente instrumento será compatible con outras subvencións, ingresos ou recursos para a mesma finalidade, procedentes de calquera Administración ou entes públicos ou privados, nacionais, da Unión Europea ou de organismos internacionais. Porén, o importe da subvención en ningún caso poderá ser de tal contía que, illadamente ou en concorrencia con outras subvencións, axudas, ingresos ou recursos, supere o custo da actuación subvencionada.

#### **OITAVA. PUBLICIDADE**

O Concello de Pontevedra deberá de dar a adecuada publicidade do financiamento da actuación subvencionada pola Deputación de Pontevedra. A tal fin, nos materiais gráficos, programas, soportes promocionais e actos públicos que realice o Concello de Pontevedra co gallo das actividades enmarcadas na décimo terceira edición dos premios Feroz incluírase a imaxe institucional da Deputación Provincial de Pontevedra, sempre respectando os termos do contrato de patrocinio suscrito polo Concello coa AICE e na medida en que a difusión do financiamento provincial resulte compatible co dito contrato.

En todo caso, as accións a desenvolver ao abeiro do convenio deberán garantir a visibilidade da colaboración entre o Concello e a Deputación Provincial de Pontevedra nas actividades enmarcadas na edición de 2026 dos Premios Feroz, así como na gala de premiación, na que se deberán de garantir a presenza da identidade institucional da Deputación en condicións axeitadas e que non colisionen coas prestacións comprendidas no contrato de patrocinio obxecto do convenio.



O Concello deberá acreditar a publicidade, e indicar as accións de comunicación realizadas. Para isto, o Concello deberá:

- Difundir o financiamento da Deputación de Pontevedra a través da páxina web municipal e, na medida do posible, nas redes sociais institucionais, incluíndo a referencia á colaboración da Deputación.
- Facer constar nas accións de comunicación ou publicidade das actividades enmarcadas na décimo terceira edición dos Premios Feroz que sexan realizadas desde o Concello (carteis, folletos, programas, cartas ou páxina web, entre outras) o apoio da Deputación. Isto farase mediante a inclusión da imaxe corporativa actualizada nun lugar visible, e na medida en que a difusión do financiamento provincial resulte compatible co dito contrato.
- As notas de prensa que se fagan desde o Concello deberán indicar o financiamento da Deputación dos gastos subvencionados.
- Comunicarlle á Deputación, cunha antelación mínima de corenta e oito horas, a realización de todos os actos públicos que se realicen no marco do convenio, nomeadamente o da gala de entrega dos premios, co obxecto de que asista a Presidencia da Deputación e/ou os/as representantes desa Corporación que se consideren pertinentes.
- Garantir a máxima dignidade e visibilidade institucional para a Presidencia da Deputación na cea ou acto oficial vinculado á gala de entrega dos premios, atendendo ás normas de protocolo establecidas pola súa organización.

Correspóndelle ao Servizo de Comunicación Institucional da Deputación dar as instrucións que se deben seguir no relativo á identidade corporativa provincial (<https://www.depo.gal/es/identidade-corporativa>).

O incumprimento destas obrigas será causa de reintegro da subvención concedida ao abeiro deste convenio.

Por outra parte, en cumprimento do establecido na resolución de 15 de xuño de 2020, da Intervención Xeral da Administración do Estado, pola que se regula o proceso de rexistro e publicación de convocatorias no Sistema Nacional de Publicidade de Subvencións e Axudas Públicas e, en aplicación dos principios recollidos na Lei 19/2013, de 9 de decembro, de transparencia, acceso á información pública e bo goberno, a Base de Datos Nacional de Subvencións operará como sistema nacional de publicidade das subvencións.

A tales efectos e para garantir o dereito dos cidadáns a coñecer todas as subvencións convocadas en cada momento de cara a contribuír aos principios de publicidade e transparencia, a Intervención Xeral da Administración do Estado publicará na súa páxina web as subvencións concedidas, segundo o establecido nos artigos 20.4 e 20.8.b da Lei 38/2003, de 17 de novembro, xeral de subvencións.



## **NOVENA.- CONFIDENCIALIDADE E PROTECCIÓN DE DATOS**

As partes comprométense ao intercambio de datos e información técnica para o cumprimento efectivo de todos os termos deste convenio coas garantías de confidencialidade que en cada caso se requiran e permanecerá exclusivamente no ámbito da relación das partes e do persoal técnico que colabore nas actividades, obrigándose a mantelo en réxime de confidencialidade por prazo indefinido e con independencia da duración do convenio.

Toda a información e documentación intercambiada no marco do convenio será propiedade das respectivas partes.

As actuacións obxecto deste convenio que impliquen o tratamento de datos de carácter persoal deberán respectar na súa integridade a normativa reguladora de protección de datos de carácter persoal.

## **DÉCIMA. COMISIÓN DE SEGUIMIENTO**

Para o seguimento e coordinación da execución deste convenio e resolución das dúbidas que poidan producirse na súa interpretación creárase unha comisión integrada por dous representantes de cada unha das administracións asinantes, un dos cales terá carácter técnico.

As súas funcións, entre outras, serán as seguintes:

- A puntual recepción de información sobre todas as actividades que se produzan na execución do convenio.
- Impulsar e avaliar o cumprimento deste convenio propoñendo as actuacións que se consideren precisas.
- Propoñer a interpretación, no caso de dúbida, do seu contido.
- Se xorden controversias na aplicación do convenio, propoñerlles ás partes a súa resolución.
- A resolución das dúbidas que presente a interpretación do convenio e, no seu caso, a emisión de informe se a dúbida ten que ser resolta polos órganos de goberno das administracións asinantes.

A comisión reunirse cando o estime conveniente o seu responsable, por decisión propia ou a petición de calquera dos seus membros.

As súas reunións terán lugar no Pazo Provincial da Deputación ou na Casa do Concello de Pontevedra. Na reunión constituínte da Comisión de Seguimento designarase ao seu responsable e ao/á seu/súa secretario/a que levantará acta das súas reunións.

## **DÉCIMO PRIMEIRA. VIXENCIA**

A vixencia do convenio estenderase ata o 30 de xuño de 2026.



O gasto obxecto deste Convenio deberá estar executado e finalizado na data límite do 31 de marzo de 2026, fixándose un prazo de xustificación ata o 30 de xuño de 2026.

No caso de que o Concello non xustifique o gasto realizado en prazo ou o realice máis aló do prazo de execución establecido, iniciárase o procedemento de perda do dereito ao cobro, non podendo utilizarse o crédito sobrance para conceder outra subvención ao Concello.

## **DÉCIMO SEGUNDA. EXTINCIÓN E CAUSAS DE RESOLUCIÓN**

De acordo co previsto no artigo 51 da Lei 40/2015, do 1 de outubro, o convenio extinguirase polo cumprimento das actuacións que constitúen o seu obxecto ou por incorrer en causa de resolución.

Serán causas de resolución:

- O transcurso do prazo máximo de vixencia do convenio.
- O acordo unánime das partes asinantes.
- O incumprimento das obrigas e compromisos asumidos por parte dalgún dos asinantes. Neste caso, notificarase á parte incumpridora un requirimento para que, no prazo que se sinale, cumpra coas obrigas ou compromisos que se consideran incumpridos. Este requirimento será comunicado tamén ao responsable da Comisión de Seguimento. Se transcorrido o prazo indicado no requirimento persistira o incumprimento, a parte que o dirixiu notificará á outra parte a concorrencia de causa de resolución e entenderase resolto o convenio. A resolución do convenio por esta causa poderá dar lugar a indemnización dos danos e perdas causados.
- Por decisión xudicial declaratoria da nulidade do convenio.
- Por calquera outra causa distinta das anteriores prevista no convenio ou noutras leis.

## **DÉCIMO TERCEIRA. RÉXIME XURÍDICO E XURISDICIÓN COMPETENTE**

O presente convenio ten natureza administrativa e rexerese pola Lei 38/2003, de 17 de novembro, xeral de subvencións, e o Real decreto 887/2006, de 21 de xuño, polo que se aprobou o seu regulamento, nos seus preceptos básicos; a lexislación básica do Estado en materia de réxime local; a Lei 9/2007, de 13 de xuño, de subvencións de Galicia; os preceptos non básicos da Lei 38/2003 e do Real decreto 887/2006; polos pactos que se conteñen neste convenio; polas Bases de execución dos orzamentos das Administracións asinantes; pola Ordenanza xeral de subvencións da Deputación Provincial e polas restantes normas de dereito administrativo, e no seu defecto, polas normas de dereito privado.

Así mesmo, a falta de entendemento previo pola Comisión de Seguimento, as partes quedan sometidas á xurisdición contencioso-administrativa na resolución de posibles controversias que puideran suscitar o incumprimento ou a interpretación do convenio.



E en proba de canto antecede, as partes que interveñen asinan o presente convenio na data da sinatura electrónica.

O alcalde-presidente do Concello de Pontevedra, Miguel Anxo Fernández Lores

O secretario do Concello de Pontevedra, José Carlos Castiñeira Piñeiro

O presidente da Deputación Provincial de Pontevedra, Luis López Diéguez

O secretario da Deputación Provincial de Pontevedra, Carlos Cuadrado Romay



Pode verificar a integridade deste documento  
no enderezo: <https://sede.depo.gal>

Código seguro de verificación (CSV):1Z67T2854R6F3RHU